

## **PRIJEDLOG**

Na osnovu člana 28. Zakona o principima lokalne samouprave u Federaciji BiH ("Službene novine Federacije BiH", broj: 49/06), člana 55., člana 86. stav 4. i člana 104. Statuta Općine Ilijaš – prečišćeni tekst ("Službene novine Kantona Sarajevo", broj: 20/09 i 46/18), člana 99. Poslovnika Općinskog vijeća Ilijaš ("Službene novine Kantona Sarajevo", broj: 2/10, 18/05 i 7/19), Općinsko vijeće Ilijaš na 30. sjednici održanoj, dana 18.aprila.2019. godine, donosi:

### **ODLUKU**

### **O USLOVIMA, NAČINU KANDIDIRANJA, ODRŽAVANJA IZBORA, DODJELI MANDATA U MJESNIM ZAJEDNICAMA I RAZRJEŠENJU PREDSJEDNIKA I ČLANOVA SAVJETA MJESNIH ZAJEDNICA**

#### **I - OPĆE ODREDBE**

##### **Član 1.**

Ovom Odlukom raspisuju se izbori za članove Savjeta mjesnih zajednica, utvrđuje broj članova Savjeta koji se bira za svaku mjesnu zajednicu, način provođenja izbora, mjesto i vrijeme održavanja izbora, organi za provođenje izbora, podnošenje prijedloga, postupak glasanja, brojanje glasova, objavljivanje i potvrđivanje rezultata izbora, mandat predsjednika i članova Savjeta mjesnih zajednica, sredstva potrebna za provođenje izbora i druga pitanja u vezi sa izbornim procesom za izbore u mjesnim zajednicama na području Općine Ilijaš.

#### **II - BROJ ČLANOVA SAVJETA**

##### **Član 2.**

U četrnaest mjesnih zajednica na području općine Ilijaš održat će se izbori za predsjednika i članove Savjeta mjesnih zajednica i izabrati broj članova Savjeta kako slijedi:

1. Savjet mjesne zajednice Dragoradi pet (5) članova
2. Savjet mjesne zajednice Gajevi pet (5) članova
3. Savjet mjesne zajednice Kamenica pet (5) članova
4. Savjet mjesne zajednice Srednje pet (5) članova
5. Savjet mjesne zajednice Ljubina pet (5) članova
6. Savjet mjesne zajednice Malešići pet (5) članova
7. Savjet mjesne zajednice Ilijaš Stari pet (5) članova
8. Savjet mjesne zajednice Ilijaš Grad pet (5) članova
9. Savjet mjesne zajednice Luka pet (5) članova
10. Savjet mjesne zajednice Misoča pet (5) članova
11. Savjet mjesne zajednice Mrakovo pet (5) članova
12. Savjet mjesne zajednice Podlugovi pet (5) članova
13. Savjet mjesne zajednice Ljubnići pet (5) članova
14. Savjet mjesne zajednice Lješevo pet (5) članova.

#### **III - NAČIN PROVOĐENJA IZBORA**

##### **Član 3.**

U mjesnim zajednicama građani će birati predsjednike i članove Savjeta mjesnih zajednica neposredno tajnim glasanjem.

## **IV - MJESTO I VRIJEME ODRŽAVANJA IZBORA**

### **Član 4.**

Izbori za članove Savjeta mjesnih zajednica održat će se u svim mjesnim zajednicama. Općinska izborna komisija raspisuje izbore najkasnije dvadeset (20) dana od objave u službenim Novinama ove Odluke, određuje tačan datum izbora i za svaku mjesnu zajednicu određuje po jedno biračko mjesto.

Kao mjesto održavanja izbora mogu se koristiti prostorije mjesnih zajednica, škole ili druge pogodne prostorije a koje odredi Općinska izborna Komisija.

Lokacije biračkih mjesta Općinska izborna komisija objavljuje najkasnije sedam (7) dana prije dana održavanja izbora, na oglasnoj ploči svih mjesnih zajednica, na oglasnoj ploči Općine Ilijaš, na web stranici Općine Ilijaš kao i putem Radio Ilijaša.

## **V - ORGANI ZA PROVOĐENJE IZBORA**

### **Član 5.**

Organi za provođenje izbora za članove Savjeta mjesnih zajednica su:

- Općinska izborna komisija
- Birački odbori

Općinska izborna komisija organizuje i provodi izbore za članove Savjeta mjesnih zajednica. U pripremi i provođenju izbora Općinska izborna komisija ovjerava Kandidacione liste (u daljem tekstu: Liste) od po (5) kandidata, određuje biračka mjesta, imenuje Biračke odbore, vrši obuku Biračkih odbora, donosi uputstva o postupku provođenja izbora i rješava sva druga pitanja vezana za izborni proces.

Birački odbori su sastavljeni od predsjednika Biračkog odbora i dva člana Biračkog odbora.

### **Član 6.**

Birački odbor neposredno rukovodi radom na biračkom mjestu i odgovoran je za pravilnost glasanja, brojanja, utvrđivanja i evidentiranja rezultata glasanja.

Rješenje o imenovanju Biračkih odbora dostavlja se svim subjektima/listama koji učestvuju na izborima, oglašavaju se na oglasnim pločama svih mjesnih zajednica, oglasnoj ploči Općine Ilijaš, web stranici Općine Ilijaš kao i putem Radio Ilijaša.

Predsjednik i članovi biračkih odbora imaju pravo na novčanu naknadu za svoj rad.

Odluku o visini naknade donosi Općinska izborna komisija.

### **Član 7.**

Sve Liste koje učestvuju na izborima za Predsjednike i članove Savjeta mjesnih zajednica mogu podnijeti zahtjev za akreditovanje po jednog posmatrača za praćenje izbornih aktivnosti na jednom biračkom mjestu.

Akreditovanje posmatrača vrši Općinska izborna komisija najkasnije 5 (pet) dana prije dana održavanja izbora.

## **VI - PODNOŠENJE PRIJEDLOGA**

### **Član 8.**

Kandidaturu za predsjednika i članove Savjeta mjesne zajednice mogu podnijeti grupe građana, političke partije i udruženja građana.

Kandidature se vrše na način formiranja Liste kandidata od po pet kandidata od kojih je kandidat pod rednim brojem jedan (1) istovremeno i kandidat za predsjednika Savjeta mjesne

zajednice, a ostali kandidati su kandidati za članove Savjeta mjesne zajednice. Lista mora biti sastavljena na način da bude predložen minimalno po jedan kandidat za svaku podružnicu koja je sastavni dio mjesne zajednice za koju se provode izbori. Prilikom predlaganja kandidata za članove Savjeta mjesne zajednice, potrebno je voditi računa da sastav Liste približno odražava nacionalnu strukturu, zastupljenost spolova i mladih.

#### **Član 9.**

Liste i kandidature za članove Savjeta mjesne zajednice podnose se najkasnije deset (10) dana prije održavanja izbora.

Liste se dostavljaju Općinskoj izbornoj komisiji pojedinačno za svaku mjesnu zajednicu.

Uz Listu se dostavljaju i ovjerene pismene izjave svih pet (5) kandidata o prihvatanju kandidature, sa minimalno dvadeset (20) potpisa podrške građana sa područja mjesne zajednice za koju se provode izbori.

#### **Član 10.**

Općinska izborna komisija ovjerava kandidaturu za svaku Listu i istu numeričke arapskim brojevima.

Nespojiva je funkcija predsjednika i člana Savjeta mjesne zajednice sa funkcijom vijećnika u Općinskom vijeću Ilijaš.

Lista će biti odbijena ako jedan ili više kandidata na listi:

- nema prebivalište na području mjesne zajednice odnosno nije upisan u Centralni birački spisak za ulice ili naselja koja pripadaju mjesnoj zajednici za koje je kandidovan;
- ako nije priložena pismena izjava kandidata o prihvatanju kandidature ovjerena od strane nadležnog općinskog organa za ovjeru;
- ukoliko ne sadrži potrebnu podršku potpisa građana propisanu u članu 9. stav 3. ove Odluke,
- ukoliko se na Listi nalazi ime Općinskog vijećnika, a da istovremeno nije priložena ostavka na funkciju Općinskog vijećnika ovjerena od strane Centralne izborne Komisije BiH,
- ukoliko ima manji ili veći broj kandidata od broja pet (5).

#### **Član 11.**

Općinska izborna komisija utvrđuje konačne Liste kandidata za članove Savjeta mjesne zajednice za svaku mjesnu zajednicu, najkasnije u roku od sedam (7) dana prije dana održavanja izbora.

Redoslijed Listi na glasačkom listiću za svaku mjesnu zajednicu utvrđuje se žrijebanjem koje provodi Općinska izborna komisija uz mogućnost prisustva po jednog (1) predstavnika Liste.

Općinska izborna komisija donosi pravilnik o provođenju izbora za Predsjednike i članove Savjeta mjesnih zajednica.

Općinska izborna komisija ima mandat da donosi odluku o svim pitanjima koja nisu definisana ovom odlukom a tiču se procesa kandidovanja i ovjere lista kandidata.

### **VII - POSTUPAK GLASANJA**

#### **Član 12.**

U mjesnim zajednicama predsjednici i članovi Savjeta mjesnih zajednica biraju se neposrednim tajnim glasanjem putem glasačkih listića.

Glasački listići se štampaju na listu papira A4 formata bijele boje, na kojem je otisnut pečat Općinskog vijeća.

Za potrebe provođenja izbora odštampat će se 50% listića za svaku mjesnu zajednicu od ukupnog broja birača upisanih u izvod iz Centralnog biračkog spiska.

Dan prije izbora Općinska izborna komisija dostavlja Biračkim odborima birački materijal koji uključuje odgovarajući broj glasačkih listića, glasačke kutije i izvod iz biračkog spiska.

U slučaju da svi glasački listići za područja mjesne zajednice budu upotrebljeni na dan izbora, na pismeni zahtjev biračkog odbora a uz mogućnost prisustva posmatrača izvršit će se doštampavanje i ovjera dodatnog broja glasačkih listića i dostavit će se Biračkim odborima.

Biračka mjesta će biti otvorena za glasanje u periodu od 09:00h do 19:00h, osim ako je dolazilo do prekida glasanja na biračkom mjestu (dodatne upute daje Općinska izborna komisija).

Glasanje se vrši upisivanjem znaka X u kvadratić ispred Liste pri čemu glasač može glasati samo za jednu ponuđenu listu.

Svaki glasački listić na kome se vidi jasna namjera birača da je glasao za jednu od ponuđenih lista uzet će se kao važeći glasački listić.

## **VIII - BROJANJE GLASOVA**

### **Član 13.**

Brojanju glasova pristupa se odmah po završetku postupka glasanja nakon zatvaranja biračkog mjesta.

Brojanju glasova pored članova Biračkog odbora mogu prisustvovati i posmatrači.

Nakon završetka postupka brojanja glasova, utvrđivanja i evidentiranja rezultata, Birački odbor objavljuje rezultate glasanja prisutnim posmatračima.

Birački odbori objavljuju rezultate sa biračkih mjesta u mjesnim zajednicama u kojima se vrše izbori.

Za predsjednika i članove Savjeta izabrana je ona lista kandidata koja je dobila najveći broj glasova sa područja mjesne zajednice.

Ukoliko dvije ili više lista kandidata imaju isti broj glasova mandat se dodjeljuje žrijebom kojeg provodi Općinska izborna komisija.

## **IX - POTVRĐIVANJE REZULTATA I DODJELA MANDATA**

### **Član 14.**

Nakon održavanja izbora Općinsko vijeće Ilijaš potvrđuje rezultate izbora za predsjednike i članove Savjeta mjesnih zajednica na području općine Ilijaš.

Općinska izborna komisija dodjeljuje mandat izabranim predsjednicima i članovima Savjeta mjesnih zajednica na prvoj narednoj sjednici Općinskog vijeća Ilijaš.

## **X - PRIHVATANJE MANDATA**

### **Član 15.**

Izabrani predsjednici i članovi Savjeta mjesne zajednice nakon potvrđivanja rezultata izbora od strane Općinskog vijeća dužni su potpisati izjavu o prihvatanju mandata koju im zajedno sa uvjerenjem uručuje Općinska izborna komisija.

Mandat predsjednika i članova Savjeta mjesne zajednice počinje danom potvrđivanja rezultata izbora od strane Općinskog vijeća i potpisivanja izjave o prihvatanju mandata.

U slučaju odbijanja prihvatanja mandata, kao i prijevremenog prestanka mandata Predsjedniku ili članu Savjeta mjesne zajednice, mandat se dodjeljuje na način da savjet mjesne zajednice predlaže Predsjednika ili člana Savjeta (vodeći računa o teritorijalnoj pripadnosti člana koji se mijenja), a imenovanje vrši Općinsko vijeće na prvoj narednoj sjednici Općinskog vijeća.

## **XI - MANDAT PREDSJEDNIKA I ČLANOVA SAVJETA**

### **Član 16.**

Mandat izabranih Predsjednika i članova Savjeta mjesne zajednice traje četiri godine, odnosno do donošenja nove odluke o potvrđivanju rezultata izbora u mjesnim zajednicama od strane Općinskog vijeća Ilijaš.

## **XII - RAZRJEŠENJE PREDSJEDNIKA I ČLANOVA SAVJETA**

### **Član 17.**

Općinsko vijeće ima pravo da raspusti Savjet mjesne zajednice ili da razriješi dužnosti predsjednika ili člana Savjeta mjesne zajednice ukoliko:

- se utvrdi da radi suprotno Zakonu, Statutu općine Ilijaš ili Statutu mjesne zajednice i drugim pozitivnim zakonskim propisima;
- Predsjednik ili član Savjeta mjesne zajednice bude pravosnažno osuđen;
- minimalno jednom tromjesečno ne održi sjednicu Savjeta mjesne zajednice i Zapisnik sa sjednice ne dostavi nadležnoj službi;
- minimalno jednom godišnje ne održi zbor/forum građana i Zapisnik sa istog ne dostavi nadležnoj službi;
- ukoliko nadležnoj Službi najkasnije do 31.03. tekuće godine ne dostavi Godišnji izvještaj o radu Savjeta mjesne zajednice za proteklu godinu .

Općinsko vijeće razrješava dužnosti predsjednika i članove Savjeta mjesne zajednice na prijedlog Službe za društvene djelatnosti i poslove mjesnih zajednica.

## **XIII - SREDSTVA ZA ODRŽAVANJE IZBORA**

### **Član 18.**

Sredstva za održavanje izbora za predsjednike i članove Savjeta mjesnih zajednica obezbjeđuju se u Budžetu Općine Ilijaš.

Zadužuje se Služba za društvene djelatnosti i poslove mjesnih Općine Ilijaš i Služba za zajedničke poslove Općine Ilijaš da obezbijedi materijalno - tehničku podršku za provođenje izbora.

## **XIV. STUPANJE NA SNAGU**

### **Član 19.**

Danom stupanja na snagu ove Odluke, prestaje da važi Odluka o uslovima, načinu kandidiranja, održavanju izbora i dodjeli mandata u mjesnim zajednicama broj: 01/1-02-511-6/14 od 27.02.2014.godine, («Službene novine Kantona Sarajevo», broj: 9/14).

### **Član 20.**

Ova Odluka stupa na snagu danom objave u "Službenim novinama Kantona Sarajevo".

Broj: 01/1-02-\_\_\_\_\_/19  
Ilijaš, 18.04.2019.godine

PREDSJEDAVAJUĆA  
OPĆINSKOG VIJEĆA ILIJAŠ

Alma Omerović, BA nov.

Obrazloženje:

## **I - Pravni osnov**

Pravni osnov za donošenje ove Odluke sadržan je u članu 28. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06) kojim je propisano da Statutom mjesne zajednice, u skladu sa Statutom jedinice lokalne samouprave i aktom o osnivanju, utvrđuju se poslovi koje obavlja mjesna zajednica, organi kao i postupak izbora, organizacija i rad organa, način odlučivanja i druga pitanja od značaja za rad mjesne zajednice.

Članom 86. stav 4. Statuta Općine Ilijaš propisano je da uslovi, način kandidiranja i održavanja kao i raspisivanje prvih narednih izbora utvrđuje posebnim odlukama Općinskog vijeća.

Članom 55. i članom 76. Statuta Općine Ilijaš definisane su nadležnosti Općinskog vijeća i propisi koje Općinsko vijeće donosi, a članom 99. Poslovnika Općinskog vijeća Ilijaš ("Službene novine Kantona Sarajevo", broj: 2/10, 18/05 i 7/19) određeno je koje propise donosi Općinsko vijeće.

## **II – Razlozi za donošenje Odluke**

Članom 86. stav 3. Statuta Općine Ilijaš propisano je da se izbori u mjesnim zajednicama održavaju prve subote u aprilu, osim ako se ovaj datum podudara sa obilježavanjem jednog od vjerskih praznika, pri čemu se održavanje izbora pomjera za prvu subotu u kojoj se ne obilježava ni jedan od vjerskih praznika.

Općinsko vijeće Ilijaš, je na redovnoj 18. sjednici održanoj dana, 29. marta 2018. godine donijelo Odluku o odlaganju izbora u mjesnim zajednicama i produženju mandata članovima Savjeta mjesnih zajednica na području općine Ilijaš, broj: 01/1-02-706-4/18 od 29.03.2018. godine ("Službene novine Kantona Sarajevo", broj: 15/18) kojom su odloženi izbori u mjesnim zajednicama do donošenja nove Odluke o uslovima, načinu kandidiranja, održavanja izbora i dodjeli mandata u mjesnim zajednicama od strane Općinskog vijeća Ilijaš. Članom 2. Odluke produžen je mandat članovima Savjeta mjesnih zajednica na području općine Ilijaš, koji su izabrani na izborima, održanim 12. aprila 2014. godine do provođenja novih izbora, a najkasnije do mjeseca maja 2019. godine.

## **III – Budžetska sredstva**

Sredstva za realizaciju ove Odluke planirana su u Budžetu Općine Ilijaš za 2019. godinu ("Službene novine Kantona Sarajevo", broj: 1/19).

Predlagač Odluke o uslovima, načinu kandidiranja, održavanja izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica je Općinski načelnik shodno odredbi člana 113. Poslovnika Općinskog vijeća Ilijaš ("Službene novine Kantona Sarajevo", broj: 02/10, 18/15 i 7/19).

Obradivač Odluke je Služba za društvene djelatnosti i poslove mjesnih zajednica Općine Ilijaš.

Predlažemo Općinskom vijeću Ilijaš da Odluku o izmjenama i dopunama odluke o osnivanju mjesnih zajednica na području općine Ilijaš donese u predloženom tekstu.